



Waageclique Rhywälle

Basel 1991

Fasnacht 2000

Sujet:

Gäll, dä Brunnen isch goldig..?

S gilt dr Zschokkebrunne z rainige,
me duet sich uff Spezialischten ainige,
derno wird s Brunnebeggi gleert
und um dr Brunne wird no gspeert.
Mit Brätter duet men als verschaale
um denn mit Sand d Figure z straahe

**Und uffaimool, lueg au do,
Stoht dr Brunne goldig do.**

Dr Dänggmoolpfläger wird ganz blaiich,
zerscht dänggt är ane beese Straich.
Die Brunnebutzer hänn statt renoviert
dä scheen Zschokkebrunne fellig ruiniert.
An Dänggmoolpfläag drum e guete Root,
nämmet doch ebber wos au verstoht.

**Dr Zschokke im Himmel isch fassigsloos
und losst vor Schregg en Urschrey los.**

Me glaubt nit wieviel Dilletante z Basel wiete,
und s hett nit numme eso handwärgligi Niete.
Zem Byspiel die glungene Dame und Herre
wo sich als no gege dr Minschterrhywäg wehre.
Dä umstritte Stääg vo dr Dalbefähri zem Minschter
miech s Loch vo dr arme Kirchemuus halt finschter.

**Am Stamm maint ain bimene Kaffi Lutz,
schitzet is doch vorem Haimeschutz.**

D BVB baut kräftig in der Innestadt.
Tourischte findes iberhaupt nit glatt.
Kai Dramm fährt me dur d City duure,
e Märtfrau hinderem Stand duet gnuure,
vo Bagger und Baumaschine ghetzt;
isch das die Wärggstadt Basel jetzt?

**Die BVB-ler am Claragraben ääne
leege d Innerstadt in Quarantäne.**

Me versetzt die alt Dreyroosebrugg
ganz ganz langsam, Rugg fir Rugg.
Vyyl Lyt dien die Zyglete z bschaue,
do hett ain uss dr zwaite Raihe gschraue;
wenn ich die Brugg so schlyyche gseh
Dängg ich sofort an d BVB.

**Die ney Farb vo Dramm und Bus
Isch alles anderi als e Gnuss**

D Cornaz goht zer Regierig uss,
jetzt gits Lääben in das rote Huus.
Vier Männer und ai Frau wänn in dä Root,
zwei Kandidate hänn kai Ahnig was dert goht.
Sy wurde dr Regierig iberhaupt nit nutze
die kennte doch au go Brunne butze?

**S isch glych was uff dr Zeedel hesch gschryybe
D Hauptsach isch, - s sinn aifach wieder Siebe.**

Jetzt ab uff d Gass und gniess dä Rummel.
3 Daag Fasnacht und derzue dr Bummel
und wenn deheim dy Schätzli bällt
denn kunnsch au Du uff d Wält.

D Ladäärneusstellig isch denn also au goldig... Me goht.

Dää Zeedel het is wie allewyyle d Druggerei Bürgin in Birsfælde drugt. Dange.